



A cjase di Toni , di un pôc di timp in ca, no si viveve plui in pàs come prime, ancje il cjan al vuagnave simpri e al lave a cirî chê frute pal bearç. Ma soledut Rite , la sô femine si cruziave, e veve un modon tal cûr che i pesave. Ma nol jere facil, i mancjave tant ancje a lui chê frutate e la vite no jere plui chê.

Jê e jere come une cisile in cjase, simpri legre e tant primurose, ancje un pôc stuzigote, ma tant, tant ninine.

Un biel dì Martine si jere presentade cun chê gnove: Mame, tate, jo o vuei continuâ i miei studis a Vignesie, o vuei lâ a notâmi ae Facoltât di Architeture. “Po ben li par li, Rite e Toni no le vevin cjapade tant sul seri e a vevin butât là: “Si viodarà, o pensarìn ce che si pues fâ!” In sumis, a jerin restâts dubiôs.

Martine e jere rivade a convinci ben cun chê sô grazie dute la famee.

Vignesie no jere tant lontan, e Martine ju veve ben sigurâts di vignî a cjase cuasi ogni setemane e duncje no vevin di vê tante pene par jê, che no lave insom dal mont.

Une matine, biel che Rite e faseve lis voris par cjase, al sunave il telefon,

- Martine, Martine, sêstu tu?

- Si, mame ,staiso ben?

- Us telefoni par visâus che sabide o vegnarai a cjase e no sarai sole, o vegnarai cuntun amì, un compagn di studis, no stait preocupâsi, al è un zovin par ben, nol è di chenti, al è un zovin Indian.

A Rite i clopavin i zenoi e i zirave il cjâf. La none che e sintive pôc e tirave lis orelis plui che

e podeve e murmuiave sotvôs.

- Diu, Diu, un Indian cu la plume? Nus mancjave dome chest!

- Po ben, cumò baste! Al diseve Toni

- Ancje se al ven chest Indian, cu la plume o cence plume, al ven come amì di Martine e al devi jessi ben acet.

Par fâ biele figure cul forest, Rite e veve preparât lasagnis di prin, polente e frico, muset, luianiis e lidric cu lis fricis. Toni al puartave la butilie dal Merlot. Dut al jere pront, ce che di miôr la cusine furlane e pues ufrî.

A pene rivade Martine e veve cjatât pari, mari e none che a jerin za su la quarte di cjase in spiete. Martine denant dal amì, i faseve strade viers la cjase. Rite e tirave il voli par cjalâ chel zovin.

I ricuadave chel biel atôr che e veve viodût tancj agns indaûr par television, si clamave..., cumò si visave - Kabir Bedi - che al veve fat la part di Sandokan.

A pene il zovin si jere svicinât a lôr al veve fat un inchin di riverence par saludâ.

- O vin plasê di cognossilu.

I diseve Rite, e lui i rispuindeve - Molto, molto onorato! - e si pleave une altre volte.

Martine e clamave il pari e i diseve: - Tate, ti presenti Shamir.

La taule biel preparade, tal mieç la polente che e fumave e il frico.

A viodi chel spettacul Martine e Shamir si cjalavin in muse cui voi spalancâts e a fevelavin alc par inglês.

Toni nol capive nuie di chê lenghe, ma la muse che e faseve Martine no i plaseve par nuie.

- Tate - i diseve - Jo e Shamir us ringrazìn di cûr par dut chest che o vês preparât par nô, ma o varessin une propueste di fâus, o varessin pensât di lâ ducj in Pizarie a mangjâ une buine pize.

Di sigûr chel gustâ par Shamir nol jere adat.

E cussì si cjatavin a taule in Pizarie, la none cuntune mignestrute par vie dai dincj, pari e mari cu la pize che mai come chê volte i restave sul stomi e no i leve jù, tant che e jere indigjeste. Martine e Shamir si cjalavin tai voi contentons e une vore agrâts par chê biele serade. La frute e cjalave Toni e cuasi indovinant il so pinsîr, i faseve une cimiade cul voli come che e jere usade a fâ cul so estri e i diseve: Tate, metimi in bande il frico e polente e

dut chel ben di Diu che o vuei puartâ vie a Vignesie, che no si cjate là e mi mancje tant, come ancje voaltris, par sintî ancjemò i savôrs di cjase.

A Toni a jerin bastadis chês peraulis par sintîsi svolâ, i lusivin i voi e al cjalave Rite come par dî.

- No je cambiade, e je simpri jê, la nestre frute!

di Egle Taverna